

COMUNICATO n. 3115 del 23/10/2025

An öffentlesche trèff pinn vorsitzar Fugatti un di asesören Zanutelli zo reda übar di näüing arbatn vürgeväart von komisardjo Giovanazzi un augehaltet vodar Provìntz vor 2,4 mildjü euro

Lusérn, zboa näüge prodjekte bidar åzoheva: khindargart 0-6 djar un sportif zentrum

[Cimbro] Lusérn iz a kamòuschaft boda schauget vür un da provintziàl vüarom hatt geböllt auhaltense pitt konkrètege sachandarn vor di pürgar vo haüt un vor di djeneratziongen boda bartn khemmen. Disar iz gest dar tèma von öffentlesche trèff bodase iz gehaltet in lånt an erta atz 21 von bimmat, geböllt von komisardjo Nerio Giovanazzi zo macha khennen zboa prodjèkte augehaltet pinn gèlt vodar provintziàl Djunta: auzpezzarn in sportif zentrum un herrichtn in khindargart boda gian di khindar von 0 afte 6 djar. In gântzan dar schütz vor di zboa prodjèkte bart soìn vo mearar baz 2,4 mildjü euro. In trèff, boda hãm genump toal ettlane pürgar o, soindada gest dar vorsitzar vodar autonome Provìntz vo Tria Maurizio Fugatti, di asesören vor di lånt emtar Giulia Zanutelli un di diridjenten von finantzièll lånt Dianst Francesca Galassi. 'Z iztada gest in sala dar pürgermaistar vo Folgrait Michael Rech o. "Dar Giovanazzi hatt gearbatet vil, åhevante vonar situatziong boda sichar iz nèt gest dèstar – asó hatta khött dar vorsitzar Fugatti – 'Z iz nia vürkhent azta da provintziàl Djunta hatt gemocht abegem an kamòu Rat, un ditza iz gest eppaz sberz. In ditza djar un a halbez dar komisardjo hatta gelekk kraft, profesionalitét un liap vor disa kamòuschaft, lazzante haüt in pürgar vo Lusérn a vüarom in ordnung, boroatet zo schauga vürsnen åna ångst". Börtar auzohalta di kamòuschaft hattze khött di asesören Zanutelli o: "Da provintziàl Djunta iz drå untarzolega bichtege hilfän auzohalta di famildje un zo macha stian di laüt zo leba in di lentar vo pèrge un dise schütz zuargètt in lånt vo Lusérn stian in gântzan drinn in disa stratedjia. I khü vorgèllzgott in komisardjo Giovanazzi vor di arbat bodar hatt gemacht un vor di mittarbat bobar hãm gehatt".

In soi rede dar komisardjo Giovanazzi hatt geböllt khön vorgèllzgott dar provintziàl Djunta un in pürgar bodada hãm gegloabet, gedenkhante ke dise zboa prodjèkte soìn a bichtegar tritt zo kheara zo macha lem di kamòuschaft. "In dise månat habar gearbatet vil un hõarante hèrta bazta hãm gehatt zo khöda di laüt boda lem alle tage in lånt – hatt no khött dar Giovanazzi – 'Z zil iz daz sèll zo lazza Lusérn sterchar, pitt struktùrn boda servirn in laüt: dar näüge sportif zentrum un dar khindargart soìn arbatn gemacht vor di djungen un vor di famildje, zo machase stian zo leba in lånt".

Di zboa arbatn soìn khent gezoaget punkt vor punkt. Dar khindargart 0-6 djar, azpe da hatt gedenkht di asesören Zanutelli, steat drinn in di stratedjia vodar Provìntz zo sterchra di politike vor di famildje un di schual dianst in di lentar von pèrng. Ma lekk vür auzzorichta da alt schual, boda iz toal von stòrege, kulturàl schatz vo Lusérn, balse bart soìn verte bartnda mang vennen platz dar zentrum 0-6 legante panàndar saiz 'z khindarèst saiz in khindargart. Disa arbat iz khent darkhennt vodar Djunta azpe da earst boda mocht khemmen gemacht pitt groaza aile, sichrante 1,2 mildjü euro, dar 85% von sèll boda bart khemmen gezert in

gântzan. “Disar prodjèkt – hatta khött di asesören – khint auz vonar arbat boda iz khent gemacht pittnândar un geat inkontra in laüt boda asó mang leng panândar arbat un famildja, opfrante edukatìf dienst pittnar hoachan qualitèt”.

Di arbatn auzzopezzra in sportif zentrum, anvétze, soìn khent ågenump vor an schütz vo 1,2 mildjü euro, dar 95% von sèll boda bart khemmen gezert in gântzan. Dar prodjèkt lekk vür abezonemma ’z gehäüs bodada sa iz un boda romai iz gelekk kartza letz un bidar aumachan an åndarz boda bart hãm apört un lokél boda bartn servìrn zo mudarase, ’z gehäüs bart hãm an fotoltaische impiãto, darzuar barta khemmen gemacht a naügar spòrtplatz vor mearare spòrt. Disa arbart bart bidar gem dar kamòuschaft an modèrnegen platz boda mang nützen alle, laüt von lånt un turistn un mage soìn dar haup platz vor allz bazta ågeat in spòrt.

An lestn dar vorsitzar Fugatti hatt gedenkht ke afta zimbar hoachebene di Provìntz iz drå untarzolega in gântzan 26,4 mildjü euro vor strategesche arbatn: “Alle dise arbatn vor beng, schualn un sportif impiãte gian in an uantzega dirèktzion: stercham di dienst vor di laüt asó aztada mang soìn di konditziongen zo maga gian vürsnen zo leba un zo arbata in di lentar von pèrng”.

Zbisnen in bichtegarstn arbatn soinda, dar bege von Laaz – toaln 1 un 2, boda bartn khemmen gezert in gântzan 12,7 mildjü euro un boda est soìn drå zo khemma apaltàrt: dise arbatn leng vür zo macha an tunnel lång 250 mètre boma mage machan lai in nidarbart pittnar korsia vor di redar un haltn di stòregen galerian von bege vo est zo giana in aubart un darzuar prükkla un auzbetarn zuar in tal.

Darzuar izta vorgelekk auzzopezzra in Statàl Bege 350 afte hoachebene vo Folgrait zbisnen in km 1,5 un in km 7 untarlegante schiar 4,9 mildjü euro (’z izta dar tèknesche ekonomege prodjèkt) auzpezzarn un betarn in Statàl Bege 349 zbisnen in km 17,3 un in km18 tra Pian dei Pradi un in tunnel vor disa arbat soinda khent untargelekk 6,1 mildjü euro (briaf bia vürzovüara in prodjèkt). Un no barta khemmen gemacht a naügar vuaz bege atz Gasperi nå in Statàl Bege 349 vor 1,29 mildjü euro (’z izta dar tèknesche ekonomege prodjèkt) sicharn in tòkko von Statàl Bege 349 vo Folgrait boda nidarizgerütscht atz 12 von hornung 2024 (366 tausanhk euro, di arbatn soìn nå zo khemme gemacht) un dar studjo zo macha a naüga umkhear atz Ekken vo Folgrait, da hattma geschètzt z’zera 1 mildjü euro.

Übarsetzt von Schaltarle vor di zung von Toalkamou vodar Zimbar Hoachebene

(cdt)